

Sedrun

Tina Monn-Soliva



(Sd) Quei di che la mort sparta dus consorts per adina, ch'ils affons ston prender cumiau dalla buna mumma e che la cuminanza piarda ina persuna respectada e plein buontad, quet'ins ch'ina part dil mund sballuni. Igl ei freid e criu, ins sesenta bandunaus e trests. – In tal mument da depressiun havein nus era giu, stend sper la bara da noissa vischina Tina Monn, ch'in grond diember da pievel ha accumpagnau ils 15 da schaner 1985 alla fossa. Ella ei morta sco ina candeila stezza, che ha buca tschera pli (plaids ord il riug da bara da nies augsegner Sur Giusep Cathomas). La forzas dalla defuncta eran consumadas. La mort ha vitorisau ed ei la finala stada liberaziun e spindrament da tutta dolur e suffrientscha.

La Tina ei naschida ils 20 da schaner 1916 a Sedrun sco secund affon ord la lètg da Gion Antoni Soliva e Maria Cresenzia nata Beart. Ella veva strusch dus onns che la mumma vegn clamada nunspetgadamein ord que-

sta veta, ual el mument che la famiglia havess duvrau ella pir che mai. Ils augs e las ondas vin Gonda prendan la Tina tier els e tralaian nuot per dar alla pintgetta in cauld dacasa. Cun 14 onns tuorna ella a casia tiel bab e tiel frar Bruno e surpren il tenercasa, franc buca in lev pensum per ina mattatscha che va aunc a scola.

Igl onn 1948 sospusa ella cul giuven Tumaisch Monn da Sedrun e secasa leu ella casa dil tat Beart. Il Segner schenghegia als geniturs 3 feglias, dallas qualas la secunda miera gia els emprems onns dalla veta. Il nunstuncienteivel quitau per la famiglia ei l'emprema devisa dalla defuncta. Igl onn 1952 sto la mumma bandunar consort ed affons e serender duront biabein in onn a Tavau per far cura. Ils ligioms da famiglia e parentella ein buns ed ins segida ton sco pusseivel, nua ch'ins sa e po. La Tina serestabillescha stupent. Returnada a casa, se senta ella puspei ventireivla e plein forzas. Per segidar cun la gronda famiglia dil frar Bruno, prendan il Tumaisch e la Tina la niazza Rita tier els, ins sa quasi dir sco atgna feglia. Ensemble cun sias duas cuserinas gauda ella ina buna educaziun e passenta cheu ina ventireivl'affonza. Quella fontauna da carezia ei buca stada senza 'influenza e flessegia aunc adina. Quei ha ins sentiu a caschun dalla malsogna e mort dalla Tina.

Duront quasi 15 onns ei la defuncta stada gideivla el menaschi dalla centrala da latg a Sedrun, ina survienta amicabla e beinvulenta viers la clientella. En tut siu far e demanar, seigi quei vid la lavour, en cumpignia ni sin via, derasava la Tina buontad e cumentientscha. Ella fuva propri in castgaun original ed aviert, ina persuna carezada da parents e vischins. Ella schava scalarir la glisch da sia candeila e deva clarezia. Quella forza ha ella

retschiert da sia profunda car-
dientscha.

Baul, a nies maniar anzi baul, ha la Tina stuiu prender cumiau da quest mund. Admirabel eisi, co la defuncta ei seremessa en sia sort ed els mauns da Diu e co ella ha sezza consolau ils ses schend: «Hagies curascha e hagies adina la pasch e vegni bein perina. Jeu vegn a rugar per Vus». – Il consort e las feglias han fatg bien cun la mumma, els han fatg il lur e san esser satisfatgs.

Ei dat buca in cumiau perpeten per quels ch'ein uni in cun l'auter. Nus lein sereguardar dalla defuncta e nossas oraziuns e salvar ella en buna memoria. Alla famiglia en malencurada noissa sincera condolentscha.